

禮  
記  
補  
疏

禮記補疏叙

三禮之名自漢有之或以儀禮爲經禮記爲傳或斥周官而疑儀禮以爲非聖人作以余論之周官儀禮一代之書也禮記萬世之書也必先明乎禮記而後可學周官儀禮記之言曰禮以時爲大此一言也以蔽千萬世制禮之法可矣周官儀禮固作於聖人乃亦惟周之時用之設令周公生宇文周斷不爲蘇綽盧辯之建官設令周公生趙宋必不爲王安石之理財何也時爲大也且夫所謂時者豈一代爲一時哉開國之君審其時之所宜而損之益之以成一代之典章度數而所以維持

此典章度數者猶必時時變化之以掖民之偏而息民之詐夫上古之世民苦於不知其害在愚中古以來民不患不知而其害轉在智伏羲神農之時通在折民之愚故通其神明使知夫婦父子君臣之倫開其謀慮使知樹蓀貿易之事生義農之後者知識既啓詐僞百出其黠者往往窺長上之好惡以行其姦假軍國之禁令以濟其賊惟聰明睿知有以鼓舞而消息之故黃帝堯舜氏作通其變使民不倦神而化之使民宜之通其變而又神而化所爲民可使由之不可使知之殺之而不怨利之而不庸民日遷善而不知所以爲之者治之極

也禮之經也明明德矣又必新民知止而歸其要於絜矩因天命之性以爲教矣又必不動而敬不言而信而歸其要於無聲無臭篤恭而天下平於大有爲而見其恭己無爲於必得其名而見其民無能名吾於禮器禮運大學中庸等篇得其微焉余鄉讀禮記嘗爲索隱一書西鄉徐心仲將草稿持去已而徐物故莫知所在十數年來專力於易未之計也甲戌夏尋得零星若干條次爲五卷今復刪爲三卷皆少作第攷究訓故名物於大道未之能及衰病氣羸亦不復能闡其精微而增益之述其大略於卷首有力能舉其全者或由余言推焉

可也嘉慶二十三年歲次戊寅七月焦循書於半九書塾之仲軒

禮記補疏卷一

江都焦循學

不好狎圖爲傷敬也人則習近而好狎

循按賢者狎而敬之注云狎習也近也謂附而近之  
習其所行也然則此注習近二字解狎字敬卽在狎  
字內狎之正所以敬之乃惟其爲賢人斯可以習近  
爲敬若不問其人之賢否概以習近爲敬則是好爲  
習近苟於敬人爲好狎亦爲傷敬故云人則習近人  
則二字解好字也傷敬謂傷於用敬猶輕死謂之傷  
勇輕與謂之傷惠正義云若直近而習之不加於敬

則是好狎非注義矣夫附而近之至於習其所行所以敬之者至矣惟不問賢否遇人則附近習其所行斯則習所不當習敬所不當敬也

立不中門禮記集說中門謂棖臬之中央

循按孔穎達謂門有一臬賈公彥謂門有二臬考玉藻旣云君入門介拂臬大夫中棖與臬之間士介拂棖又云賓人不中門賓不中門斷無大夫轉中門之理然則中棖與臬之間非中門無疑鄭氏彼注云君入必中門上介夾臬大夫介士介雁行於後示不相沿也夾臬緊承君言雁行緊承上介言則夾者與君

夾後者後於上介君行兩臬之間近臬上介隨君後而當臬外大夫隨上介後而當根臬之間士介隨大夫後而當近根雖相隨而斜若雁行故其步趨不相沿然則君行中門在兩臬之間大夫行根臬之間非中門也鄭氏注聘禮引玉藻而釋之云門中門之正也以門中明中門知爲門之中非根臬之間根與臬之間非正也又云不敢與君並由之敬也正以兩臬之中惟君獨行賓不敢並若一臬分行兩畔不可爲並矣聘禮注又云介與擯者雁行卑不踰尊者之迹亦敬也此與不相沿相發明謂上介尊於大夫大夫



尊於士上介旣拂臬則大夫不敢沿之亦拂臬以致  
踰其迹故中棖臬之間以爲敬若經文之中門卽棖  
臬之間則賓不中門大夫反中門斷無此理且大夫  
不敢踰上介之迹而轉敢踰君之迹非鄭氏義也孔  
氏玉藻疏引皇氏崔氏以中門卽棖臬之間非是皇  
崔之說蓋以此注言棖臬之中央爲玉藻中棖與臬  
之間不知棖與臬之間與棖臬之中央文相似而實  
不同推鄭之意棖臬之中央謂兩棖兩臬之中央也  
說文半門爲戶兩戶爲門是兩棖之間統謂之門門  
之司啟閉者爲扉臬則所以介此門者一門介而爲

三必用二梟曰中門則必中於門卽中於兩楹兩梟之中央曰中楹與梟之間則中於一楹一梟之間曰闔門左扉立於其中則居扉之中扉自楹而過梟當兩梟之中則扉中又異乎楹與梟之間有時謂之門中猶不必其正中如士冠禮特牲饋食禮云門中梟西闔外聘禮言立於門中以相拜此如室中爲一室之中房中爲一房之中廟中爲一廟之中是亦門爲大名之證若中門則正中矣猶中堂必中於堂中庭必中於庭中席必中於席中道必中於道楹與梟之間可稱中門將中堂西楹之間可稱中堂中庭以東

亦可稱中庭矣

則必鄉長者所視謂爲遠視不察有所問

循按不察謂目眊不明察上從於先生注云先生老人教學者老故目不明此長者卽先生也

將適舍求毋固謂謂行而就人館固猶常也求主人物不可以舊常或時乏無

循按下文聲必揚承上將上堂則求毋固必承將適舍將適舍尙未適舍何遽求主人物意與上不屬竊謂求謂求入也主人固辭則可以不適矣若主人固辭吾固請或主人有他故不欲見客或主人以厭惡

疏遠我固請適之戾矣玩下由上堂而及入戶此適舍以在門請謁時言也

長者不及毋僂言

僂

僂猶暫也非類雜

循按廣雅僂疾也暫猝也謂不可猝然急疾言之也說文僂僂互不齊也僂互不齊卽非類相雜詩小雅漸漸之石惟其卒矣漸漸卽巉巉衆石之中特高銳而出其名爲卒卽以其猝然也猝然銳出於衆中是非類雜出而僂互不齊也言未及已而猝然以言銳出自見猶石之銳出以自高也非類雜三字與暫義相足

毋勦說勦猶擥也謂取人之說以爲己說

循按毛詩傳摻擥也廣雅摻操也勦取也釋名操鈔也說文鈔又取也勦擥摻操取義同鄭以擥訓之又以取明之胡詮禮記傳云勦猶抄也襄二十五年崔慶之盟曰所不與崔慶者晏子仰天嘆曰嬰所不唯忠於君利社稷者是與有如上帝杜預云讀書未終晏子抄答易其辭是謂勦說依是則鈔乃易人之說蓋人說未終而我斷絕其說以爲我說曹氏憲博雅音云禮記無勦說鄭注云勦由擥也謂取人之說春秋左傳無及於鄭而勦民焉用之杜訓爲勞是則勦

從刀而勦從力明矣說文刀部無剿有剝云剝絕也  
夏書曰天用剝絕其命力部云勦勞也春秋傳曰安  
用勦民天用剝絕其命今在甘誓正作勦然則毋剿  
說之剿卽甘誓之剝公羊傳云其言取之何滅之也  
鄭言取人之說以爲己說謂斷滅人之說以己之言  
篡之訓取訓絕義正相輔若謂襲人之言此乃雷同  
玩承上正爾容聽必恭是聽先生之言時事不待其  
言之終截取以爲己言與聽其言而隨而附和之均  
非恭也此剿字爲廣雅剿取也之剿爲說文剝絕也  
之剝與勦民之訓勞者迥異曹氏辨之甚精勦之訓

勞與取絕摻摻之義不相合若云以手搯持不免於勞轉爲俗矣

笑不至矧齒本曰矧大笑則見

循按釋文矧本又作哂說文笑不壞顏曰攷廣雅哂引皆訓笑一切經音義云哂字書作引或作攷引三蒼云哂小笑然則哂乃攷之假借笑不壞顏故爲小笑此注訓矧爲齒本申言大笑則見蓋讀矧爲齧之假借說文齧齒本也不以爲哂經稱笑不至矧則是微笑不大笑若矧爲哂之微笑是不至矧爲不微笑不微笑是不笑不得云笑不至矧也

醫不三世不服其藥慎物齊也

循按不讀神農黃帝之書不知針灸本草脉訣不可  
爲醫一醫字已詳審其能讀書知藥物矣然又必祖  
孫相傳乃不致以紙上陳言誤人生死所爲慎物齊  
者如此不知醫而徒以三世固非慎徒以其讀神農  
素問之書而不三世亦非慎彼不能讀書不可爲醫  
而妄稱爲醫者早屏之不論不議又何問其三世否  
也潛邱劄記言元人葛恆濟嘗立說以爲醫當視時  
之盛衰爲損益劉守真張子和值金人強盛民悍氣  
剛故多用宣洩之法及其衰也兵革之餘饑饉相仍



民勞志困故張潔古李明之多加補益愚謂司天在  
泉素問詳矣而三元甲子以百八十年而周上元風  
木中元火土下元金水氣化既殊治法亦異非三世  
不足以目驗知之

雞曰翰音注翰長聲也

循按說文翰天雞赤羽也又云鶡雉肥鶡音者也魯  
郊以丹雞祝曰以斯鶡音赤羽去魯侯之咎蓋鶡音  
之名本於鳴聲之長周之典禮專其名於雞雞不一  
種其雄而赤色高大而肥者應時仰首高鳴用此爲  
犧故以翰音名之以其用之於郊則稱天雞以其色

赤則稱丹雞以其鳴聲之高則稱翰音實卽雞之雄而色赤者今人祀神必擇雄雞之紅色長尾高鳴者仍古之遺非別有異也

鹽曰鹹鹺注大鹹曰鹺今河東云

循按水經涑水注春秋成公六年晉謀去故絳大夫曰郇瑕地沃饒近鹽服虔曰土平有漑曰沃鹽鹽池也土人鄉俗引裂沃麻分灌川野畦水耗竭土自成鹽卽所謂鹹鹺也

四足曰漬注漬謂相漑汙而死也春秋傳曰大災者何大漬也

循按說文灑漬也字與漸通廣雅染汙也灑汙猶云  
漸染也謂瘟疫相漸染今里俗稱牛豕之死爲瘟猶  
古之遺意也

庶人之摯匹注說者以匹爲驚

循按白虎通瑞贄篇引曲禮而解之云匹謂驚也注  
所云說者指此蓋周禮大宗伯以禽作六摯庶人執  
驚用以相準故以此匹爲驚匹之訓爲偶爲雙不知  
何物故擬之云此偶謂驚謂兩驚也非匹有驚訓孟  
子力不能勝一匹雛趙岐注云人言我力不能勝一  
小雛以匹爲小孫宣公以爲少字之譌是也注稱以

匹爲驚卽與匹謂驚同意訓詁之體凡謂之云者皆非定稱也鄭注士相見云庶人之摯驚此自用大宗伯非易曲禮之匹爲驚也釋文直音匹爲木正義直云匹驚也失注義

喪三年以爲極亡去去已久遠而除其喪則弗忘之矣則則之言會

循按亡除去三字義相近此注除字解亡字除其喪之喪卽經文喪字經文喪字句三年以爲極句亡字句亡卽亡去其喪故云除其喪去已久遠四字解三年以爲極至於三年喪已極矣宜除去其喪下文作

轉言喪雖亡而心則不忘正義以喪三年爲句以爲極亡爲句於辭未達

冉子攝束帛乘馬而將之注攝猶貸也

循按古訓代爲更訓貸爲假此時夫子使者未至而冉子以已物將之是假借而非更易故云猶貸也下云不誠謂假借則不誠實正義用代字意雖不遠而究非貸字義

未嘗見齒注言笑之微

循按謂大笑見矧微笑見齒未嘗見齒直不微笑也以爲活也注活猶略也

循按儀禮喪服傳冠者沾功也注云沾猶麤也又大  
功布注云其鍛治之功麤沾之麤沾猶云姑且

居處言語飲食衍爾衍衍爾自得貌爲小君惻隱不能  
至

循按衍古與侃通說文訓侃爲剛直衍爲喜貌爾雅  
訓衍爲樂廣雅訓衍衍爲和於是論語侃侃如也孔  
注訓和樂貌是通侃侃爲衍衍也漢書張敞衍衍履  
忠進言後漢樊準傳每燕會則論難衍衍此通行衍  
爲侃侃也

章懷注衍衍  
爲和樂非

此衍爾當通侃處小君喪但

形其剛直而和樂之容不存與上大夫言閭閻閭閻

和悅而諍也和悅而諍是和悅與剛直相兼侃侃則  
但剛直而已詩羔羊序云在位皆節儉正直德如羔  
羊箋云從於公謂正直順於事也委蛇委曲自得之  
貌節儉而順心志定故可自得自得本之節儉正直  
節儉正直是剛直不是和樂此注以自得解衍爾形  
其本來之剛直無哀痛亦無喜樂也

銘明旌也



神明之精

循按說文旌游車載旌析羽注旌首所以精進士卒  
釋名析羽爲旌旌精也有精光也旌之義取於精故  
以精解旌

般爾以人之母嘗巧則豈不得以已以已字言誰有強使女者與僭於禮有似作機巧非也以與已字本同其母以嘗巧者乎則病者乎已毋無也於女寧有病苦與止之

循按此注詳明正義亦了釋文出爾已云古以字然則爾以之以本作已不得以之以本作已後以不得已作以故鄭明之且云言誰有強使女者與此正摹寫豈不得已之口吻又申言之云以與已字本同謂當時以已二字通用其云僭於禮有似僭於禮承上公室視豐碑僭天子三家視桓楹僭諸侯有似二字



承上魯有初三字此雖僭禮而魯行之既久是爲故  
事可以似續而行若作機巧則前未之有是可已止  
者也豈有人強之而不得已止乎注意明白可見人  
之母指季康之母其母之母注明訓爲無母之爲無  
猶以之爲已其無以嘗巧者乎則病者乎猶云其無  
以嘗巧則病者乎中複者乎二字乃屬文之法無可  
疑者自刻本母母兩字或有譌誤萬氏充宗遂讀則  
豈不得以其母以嘗巧者乎作一句是不讀以爲已  
而改母爲母無論非注義而古人屬文頓挫曲折之  
妙盡失說者或又讀則豈不得爲句以其母以嘗巧

者乎作一句謂以人之母嘗巧指般言般以人之母  
嘗試其巧則得矣謂以其母以嘗巧指康子言康子  
以母嘗巧則病矣若然宜云以母嘗人之巧則病者  
乎今日以其母非向康子矣公肩假呼般之名又稱  
之曰爾爾字一氣貫注噫字注疏句讀甚精無容疑  
貳以己同字余於詩箋詳之

請庚之注庚償也

循按庚同更更代也庚亦同賡此歌彼和謂之賡彼  
有而我犯之如彼與我我因而償之一往一來更番  
相代之義也

言利政  
二  
質質然來𠄎質質目不明之貌

循按孟子則眸子眊焉趙岐注云眊者蒙蒙目不明之貌廣雅蒙蒙冥冥昧昧暗也眊質蒙蒙冥一聲之轉

祭用數之仂𠄎算今年一歲經用之數用其什一

循按易繫辭傳云歸奇于扚以象閏虞仲翔云扚所揲之餘說文無仂而有扚以易筮之扚解之仂卽扚也不曰數之餘而曰數之扚正取揲筮之義易筮以四揲之所餘者謂之扚此制國用之法三年餘一則一年餘三分之一一年餘三分之一則一年所用爲

四分之三合之爲四分是每年所入以四分之猶易筮之以四揲之也於此四分之外先取一分以爲祭用如先有扚數二十一而後知得少陽四七之數先有扚數十三而後知得老陽四九之數故借揲筮之扚以明之也設如五十里之國爲田萬二千五百畝畝一鍾鍾六斛四斗共八萬斛以四四數之每分二萬以二萬爲所蓄以六萬爲一歲經用則無扚惟先扚一分以爲祭之用譬如先取一萬斛以爲扚餘七萬斛四分之每分一萬七千五百斛卽以此一萬七千五百斛爲所蓄而以五萬二千五百斛爲一歲經

用玩下云祭豐年不奢凶年不儉則祭之用有一定之數故先存此數而後四分之其他經用則量入爲出故民無菜色然後天子食日舉以樂然則除祭之外皆因豐耗爲奢儉也喪三年不祭卽以每年祭之用合以爲喪之用故喪用三年之仿此雖平述典故而重祭之義於一仿字見之而曰暴曰浩不奢不儉與上文量入爲出下文然後天子食日舉以樂互相發明見量入爲出用諸一年經費實不用諸喪祭喪祭之用不因豐凶爲奢儉者也古人雖平叙之文必有精意焉注謂用其什一則在一歲經用之內歲有

豐耗則祭不能無奢儉矣方氏慤禮記解義以數之  
仿爲一年所用四分之一四分之一卽爲所蓄以備  
凶荒者每年有祭而所蓄僅足充祭而三年必餘一  
年者何在乎惟仿在四分之外雖極歉之年必先此  
仿譬如僅有穀一萬斛卽用以爲祭之用而是年經  
用以三年所蓄者補之

有旨無簡不聽禮記簡誠也有其意無其誠者不論以爲  
罪

循按呂刑五辭簡孚正于五刑五刑不簡正于五罰  
又云其審克之簡孚有衆惟貌有稽無簡不聽稽從

旨聲此云有旨卽呂刑之有稽博士撰王制時尚無  
古文蓋本今文也謚法一德不解曰簡一則不貳不  
貳則誠矣故呂刑簡孚並言簡孚有衆屬上其審克  
之謂五刑五罰宜審克之以誠孚於有衆惟貌說文  
作惟緇史記作惟訊宜依史記惟訊時其有旨而無  
簡者不聽訊與聽二字呼應有稽屬下與王制句法  
合

祭先脾春爲陽仲於藏直脾脾爲尊 祭先肺陽  
位在上肺亦在上肺爲尊也 祭先心五藏之次心  
次肺至此心爲尊也 祭先肝秋爲陰中於藏值肝

肝爲尊也 祭先腎陰陰位在下腎亦在下腎爲尊也  
循按天官疾醫注云五氣五藏所出氣也肺氣熱心  
氣次之肝氣涼脾氣溫腎氣寒賈氏疏云並據月令  
牲南首而言肺在上當夏心在肺下肝在心下近右  
其位當秋脾於藏值春腎位在下於藏值冬此脾木  
肺火心土肝金腎水與古尙書說合許慎異義用以  
明月令正不殊於鄭乃鄭駁之者謂木火土金水有  
位與氣之分以上下左右中之位言之則脾春肺夏  
心中肝秋腎冬以金木水火土之氣言之則肝木心  
火脾土肺金腎水月令以位言不以氣言然疾醫注



明以氣言則溫木熱火涼金寒水五氣亦本五方言之許氏以五行之氣言之亦未可駁耳特與素問醫病之法所配有不同也淮南子精神訓云萬物背陰而抱陽十月而生形體以成五藏乃形是故肺主目腎主鼻膽主口肝主耳高誘注云肺家朱雀朱雀火也腎象龜龜水也肝金也又云膽爲雲肺爲氣肝爲風腎爲雨脾爲雷以與天地相參也而心爲之主高誘注云膽金也肺火也肝木也腎水也心土也淮南所配不以五行高氏強配之非淮南本旨然肺火腎水心土肝金正同月令而肝膽並言則又以膽爲金

以肝爲木雜以素問醫病所用矣高氏注呂氏十二  
紀及時則訓並存兩說以肝木脾土爲用其所勝肝  
金脾木爲自用其臟而以自用其臟爲後一說然春  
木勝脾土夏火勝肺金秋金勝肝木爲用所勝固然  
矣而中央土何以勝心火至冬水宜勝心火而反用  
腎水何以通乎故月令之脾木肺火心土肝金腎水  
不可用以醫病而以素問之肝木心火脾土肺金解  
月令亦不可矣許慎用古尙書說說月令以鄭注疾  
醫五氣通之未之有異也

命田舍東郊

**注**

今尙書曰分命羲仲宅嵎夷也

循按尙書正義云庸生賈馬之等惟傳孔學經文三十三篇故鄭與三家同以爲古文而鄭承其後所注皆同賈逵馬融之學題曰古文尙書篇與夏侯等同而經字多異夏侯等書宅嵎夷爲宅嵎鐵近閭徵君百詩王光祿西沚皆以宅嵎夷爲夏侯等書所作而古文作嵎鐵金壇段大令若膺據索隱謂古文作嵎夷今文作嵎鐵斥閭爲誤乃此注明作宅嵎夷而題曰今尙書正義謂今尙書夏侯歐陽等所傳者然則嵎夷爲夏侯等書鄭氏自言之矣孔穎達在小司馬前且索隱自言禹貢之嵎夷耳表出之以俟參考

掩骼埋骸謂死氣逆生也

循按林氏起龍云是月天氣下降地氣上升誠恐齒  
骼穢惡之氣隨天地之氣升降混合爲一有害人物  
故掩埋之此預補造化天無功也文人解爲澤及枯  
骨失其旨矣詎春月當澤及枯骨而夏秋冬之枯骨  
遂不當澤及哉林氏自論疫病與鄭注相脗合

命國難九門磔攘以畢春氣此難難陰氣也陰寒至  
此不止害將及人所以及人者陰氣右行此月之中日  
行歷昴昂有大陵積尸之氣氣佚則厲鬼隨而出行  
天子乃難以達秋氣此難難陽氣也陽暑至此不衰

害亦將及人所以及人者陽氣左行此月宿值昴畢  
畢亦得大陵積尸之氣氣佚則厲鬼亦隨而出行  
命有司大難旁磔出土牛以送寒氣此難難陰氣也難  
陰始於此者陰氣右行此月之中日歷虛危虛危有墳  
墓四司之氣爲厲鬼將隨強陰出害人也

循按正義云天氣左轉故斗建左行謂之陽氣日月  
右行日月比天爲陰故云陰氣右行以日爲陰氣非  
也淮南子天文訓云北斗之神有雌雄十一月始建  
於子月從一辰雄左行雌右行五月合午謀刑十一  
月合子謀德董子陰陽出入上下篇云初薄大冬陰

陽各從一方來陽由東方來西陰由西方來東至中  
冬之月相遇北方合而爲一謂之曰至別而相去陰  
適右陽適左冬月盡而陰陽俱南還陽南還出於寅  
陰南還入於戌至中春之月陽在正東陰在正西謂  
之春分陰日損而隨陽陽日益而鴻初得大夏之月  
相遇南方合而爲一謂之曰至別而相去陽適右陰  
適左夏月盡而陰陽俱北還陽北還入於申陰北還  
出於辰至中秋之月陽在正西陰在正東謂之秋分  
陽日損而隨陰陰日益而大鄭氏所云陽氣左行陰  
氣右行者此也孟春行秋令則其民大疫注云申之

氣乘之也季春行夏令則民多疾疫注云未之氣乘之也六月宿值鬼鬼爲天尸仲夏行秋令民殃於疫注云酉之氣乘之也大陵之氣來爲害也未申酉戌亥皆陰而未申酉又爲鬼畢昴所屬大陵天尸之氣所佚故亢主疫素問岐伯引太始天元冊文云素天之氣經於亢氏昴畢二十八宿角亢爲辰氏房心爲卯胃昴畢爲酉觜參爲申素天爲乙庚乙在卯辰之間故經亢氏庚在西申之間故經昴畢蓋古以昴屬酉畢屬申也大陵積尸在昴畢卽在西由故乘酉之氣乘申之氣皆有疫陰主靜必承陽而動春夏秋三

時陰居無用之地不能自出惟冬月陰氣當權然在  
亥月子月陰氣在丑子其位陽不敢自強惟冬至後  
陽左行於丑陰右行於亥亥地純陰而季冬之月陰  
乘權於此在丑之微陽不足以制故命有司大難且  
旁磔出土牛以送之送者送之速入於戌也蓋陰至  
戌則陽出寅陽當令而陰氣無權也故注云強陰出  
害人陰氣之強莫強於十二月况又有虛危之氣助  
之也孟春陰氣右行至戌仲春陰氣右行至酉戌酉  
當春爲無用空虛之地酉雖昴分無以動之積尸之  
氣不能自佚惟季春陽左行至辰陰右行至申申爲



畢分而大陵積尸尙在其間適日於季春之中行於  
昴而由昴至畢大陵積尸之氣乘日之餘威而佚出  
於是陰氣之自酉至申者亦動厲鬼陰氣也遂亦隨  
而出故當季春難此在申之陰氣也孟夏陰行至未  
仲夏陰陽合於午季夏陰行至巳孟秋陰行至辰仲  
秋陰行至卯亦皆無用之地乃陰右行於卯陽則左  
行至酉而昴中大陵積尸之氣轉乘陽氣而動陰氣  
之在卯遂亦相應而出故此時難陽氣以達秋氣蓋  
陰氣因陽氣行於酉而厲難止陽氣使陰氣失其所  
恃則陰自伏於卯而秋氣自達於酉不致鬱而爲厲

也自此以後陽氣日損不足爲陰附陰雖強不能自  
動故陽自酉歷戌亥至子陰自卯歷寅丑至子皆無  
用其難矣季冬陽行丑季春陽行辰而陰氣乘日之  
所在黨合跋扈以鬱遏陽氣之行故直難止陰氣以  
達陽氣仲秋陰氣附陽氣以行其厲故轉難止陽氣  
以平陰氣此難陰難陽之義也日在昴畢虛危陽行  
至酉皆爲陰氣所乘而聖人得而消息之若孟春行  
秋令而申氣乘之季春行夏令而未氣乘之仲夏行  
秋令而酉氣乘之則陰氣隨政令之戾以動是氣之  
不正人得而治之正人得而擾之矣正義以日

行歷昴爲陰氣右行日爲太陽之精而指爲陰氣不亦怪乎

國有大恐注以水訛相驚

循按孟春行夏令國時有恐注云巳之氣乘之也以火訛相驚此季春行冬令國有大恐注云丑之氣乘之也以水訛相驚二注相例蓋以三合言也已酉丑皆金言之又屬金孟春爲寅寅火也季春爲辰辰水也以金乘火故爲火訛以金乘水故爲水訛

半夏生注半夏藥草

循按本草圖經云半夏二月生苗五月八月內採根

一云五月採者虛小八月採者實大然則生指根生  
今驗半夏苗誠生於春仲夏生者根也藥亦用其根  
不用其苗

不可以羸羸猶解也

循按釋文解古賣反則讀如毛詩夙夜匪解之解謂  
不可懈怠也羸通羸羸通累問喪身病體羸注云羸  
疲也玉藻喪容羸羸注云羸羸羸憊貌疲憊俱懈怠  
之意荀子富國篇云故君國長民者欲趨時遂功則  
和調累解速乎急疾累解卽羸解謂調和其解緩使  
之急疾也解緩與急疾相反故調和之楊倞引或說

解爲嬰累解釋非也

其臭朽氣若有若無爲朽

循按淮南子時則訓作其臭腐故釋文引說文字林云朽腐也朽或爲朽字乃高誘注呂氏春秋其臭朽云氣之若有若無者爲朽也與鄭此注同蓋讀朽爲朽元朽虛也水空虛臭亦空虛正義謂水受惡穢故有朽腐之氣非鄭義也列子周穆王篇聞歌以爲哭視白以爲黑饗香以爲朽嘗甘以爲苦張湛注引月令其臭朽朽與香作反對正謂腐穢之氣淮南蓋本諸列子以朽作腐與月令遂異列子仲尼篇又云鼻

將窒先覺焦朽此朽則正若有若無之朽焦朽之臭  
微鼻覺之猶目之視秋豪耳之聽蚋飛若爲腐朽則  
臭之遠覺者矣此朽字張湛注云微而難別卽若有  
若無之謂也

水澤腹堅注腹厚也

循按腹厚釋詁文釋文腹本又作複呂氏春秋作復  
高誘云復或作腹釋名腹複也川壅爲澤水冰堅厚  
壅而不流故云水澤正義不明

禮記補疏卷一終

姪廷

琮校字

禮記補疏卷二

江都焦循學

各以其方色與其兵。方色者東方衣青南方衣赤西方衣白北方衣黑兵未聞也。

循按管子幼官篇東方旗物尙青兵尙矛南方旗物尙赤兵尙戟西方旗物尙白兵尙劍北方旗物尙黑兵尙脅盾與正義引隱義異。

則磬于甸人。縣縊殺之曰磬。

循按方氏慤禮記解義云縣之如磬是也爾雅釋蟲蜺縊女詩覩天之妹傳云覩磬也覩猶蜺覩訓磬而



蜺爲縊女是磐爲縣縊之名

女有歸注皆得良奧之家

循按良家奧溫飽之家文選陸機君子有所思行  
善哉膏粱士營生奧且博注廣雅云奧藏也顏氏家  
訓治家篇云南陽有人治生奧博

故百姓則君以自治也注則當爲明

循按上言所明所養所事此言則君養君事君故鄭  
改則爲明以就上陳氏澔禮記集說改明爲則以就  
下其實兩不必改古人之文多參差不相應  
和而後月生焉注此氣和乃后月生而上配日

循按和卽合也謂合朔也日與月合朔而後月生明日爲陽氣天之所秉月爲陰氣地之所秉日月合則陰陽之氣合故云此氣和此者指上所云天持陽氣地持陰氣也正義謂四時不和日月乖度寒燠失所則月不得依時而生非也

不麾蚤注麾之言快也祭有時不以先之爲快也齊人所善曰麾

循按麾釋文作靡云本又作麾毀皮反齊人謂快爲麾說文快喜也鄭讀麾爲快而云齊人所善所善謂喜之也麾字卽易撝謙之撝鄭氏注易讀撝爲宣方

言云逞苦了快也郭璞注云今江東人呼快爲愜相緣反一切經音義云宣古文愜同快旣呼爲愜則讀麾爲快與讀撫爲宣同也

君子達亶亶焉達猶皆也

循按達之訓通通之義同於共故與皆近

鄉人禡禡禡強鬼也

循按說文禡道上祭無強鬼之訓鄭蓋讀若殤楚辭有國殤篇云身旣死兮神以靈子魂魄兮爲鬼雄王逸注云言旣死之後精神強壯魂魄武毅長爲百鬼之雄傑也凡夭折曰殤昭十七年左傳子產曰匹夫

匹婦強死其魂魄猶能馮依於人以爲淫厲注云強死不病也二十以下凶短折而死爲殤雖二十以上不由病死而死於殺害者與短折同其爲國死者爲國殤其匹夫匹婦不由國死亦殤也惟其強死故爲強鬼猶國殤之爲鬼雄強死之鬼爲殤與惡死之鬼爲厲其義一也春官司巫凡喪事掌巫降之禮注云今世或死旣斂就巫下禡其遺禮蓋始死之家望其魂強能返故以巫降之近里俗有回殃之禮卽此下禡誤禡爲殃也

天子樹瓜華



華果蓏也

循按爾雅華苓也又云芙薊其實苓呂氏春秋本味  
篇菜之美者壽木之華高誘注云壽木崑崙山上木  
也華實也食其實者不死故曰壽木以華訓實與鄭  
以華訓果疏同

以移民也**注**移之言羨也詩頌豐年曰爲酒爲醴烝畀  
祖妣以洽百禮此其羨之與

循按孟子梁惠王上放辟邪侈孫宣公音義云丁作  
移考工記輿人飾車欲侈注云故書侈作移杜子春  
云當爲侈韓非子解老云多費謂之侈年不順成則  
謹民財謹民財者欲其儉也順成之方其蜡乃通對

上謹民財而言則謂不妨多費故曰移民移民者侈民也漢書富者奢侈美溢美之義正與侈同故注云移之言羨也表記衣服以移之注云移讀如水汜移之移移猶廣大也水汜移猶云水汜溢儀禮少牢饋食主婦被錫衣侈袂注云侈者蓋半士妻之袂以益之以益釋侈益猶溢也天官追師注引少牢饋食禮曰主婦髮髻衣移袂此水汜移之移卽侈袂之侈侈之爲益猶侈之爲羨也羨訓爲餘爲溢正義云醉飽酒食使民歆羨失之遠矣鄭引豐年之詩以多黍多稌亦有高廩萬億及秭所謂順成之方也因年豐而

烝畀祖妣以洽百禮卽順成之方其蜡乃通之意也  
鄭蓋謂祖妣之外洽及百禮百禮爲一切衆禮則以  
秋冬之報所謂使之必報之也祖妣雖不豐年亦必  
烝畀惟年歲順成斯不獨烝畀祖妣且通祀八蜡祀  
祖之餘又通於蜡故爲羨爲益此引詩之義也孔穎  
達但解爲酒醴進與祖妣謂烝嘗於廟之祭而不解  
以洽百禮則鄭氏引詩之意亦失之矣

丹漆雕幾之美圖幾謂漆飾沂鄂也

循按少儀車不雕幾注云幾附纏爲沂鄂也春官典  
瑞琫圭璋璧琮注鄭司農云琫有圻鄂琫起圻畿幾

三字通淮南子倣真訓四達無境通于無圻高誘注云圻垠字也說文垠地垠也一曰岸也圻或从斤漢書揚雄甘泉賦紛被麗其無鄂注云鄂垠也後漢書張衡思元賦望寒門之絕垠今注引廣雅云垠鄂也鄂卽鄂明帝紀十二年乙酉詔云莫測圻岸注云圻垠也垠亦鄂然則鄂與圻義相疊圻鄂者界限之謂也凡器物邊界或用雕刻或用丹漆如衣之有緣周帀於四圍故云附纏今木工造几案起邊線或細鏤文采以爲之邊圻鄂之遺制也文選西京賦前後無有垠齔注引淮南子曰出於無垠齔之門許慎曰垠



錐端崖也無垠錐卽是無圻圍之界猶器之邊矣

管遼管筆彊也遼刀鞞也

循按說文彊弓弩耑弦所居也借弓弩之彊明筆之有管廣雅鞞鞞刀削也易大有明辨哲也釋文鄭本作遼云讀如明星哲哲遼之爲哲猶遼之爲鞞也

筭總筭筭今簪也

循按士喪禮以爵弁服簪裳於衣注云簪連也易朋合簪虞翻作戢戢卽檄檄卽檄荀子箴賦云簪以爲父喪大記君裏棺用雜金簪大夫用牛角簪注云簪所以琢著裏疏云簪訂也簪與簪同古人所謂簪蓋

所以釘物大言之同於櫛小言之同於箴故合簪可  
通作戠而賦箴可擬諸簪也漢時始名笄爲簪故云  
今也

右佩箴管線續施繫表注繫小囊也繫表言施明爲箴  
管線續有之

循按注不詳續表之義正義引熊氏云表刺也以針  
刺表而爲繫囊又云明爲四物而施矣是以箴管線  
續爲四物皆貯於繫表之中荀子箴賦云管以爲母  
楊倞注云管所以盛箴故曰爲母婦人箴貯管中猶  
男子筆彊管中既有管不必有囊矣施繫表專承線

續說文線作綫縷續同統絮也是爲兩物裘同帙書衣也古人書用竹策有以包裹之爲帙線可施以小囊綿絮宜用包裹竊謂絮以貯線表以裏續管以受箴正義未然

免薨



免新生者

循按國語句踐誓曰將免者以告韋昭注云免乳也說文人及鳥生子曰乳生子爲免因而子初生亦曰免大戴記公符篇推遠稚免之幼志注云免猶弱也劉昭後漢志注引博物記孝昭帝冠辭曰推遠冲孺之幼志然則冲孺同於稚免董萱枌榆新生者爲免

猶蒲之始生者爲弱弱之爲弱猶媯之爲免說文媯  
免于也字林魍免于也媯之爲魍猶免之爲孺矣

濡魚卵醬𩺰卵讀鯤鯤魚子或作攔也

循按說文卵部云卵凡物無乳者卵生不言其聲唐  
元度九經字樣以𠂔爲說文古卵字說文絲部云𦉳  
从絲省𠂔聲又門部云關从門𦉳聲由關之音以推  
卵則卵與攔同聲故詩甫田總角𠂔兮𠂔與變字爲  
韻毛傳以幼穉訓之正取卵之義蓋卵爲無乳而生  
之統名鯤爲魚子之專名音同相通故卵讀爲鯤

蝸𧈧蝸蟬也

循按荀子致士篇云夫耀蟬者務在明其火振其樹而已楊倞注云南方人照蟬取而食之禮記有蜩范是也

范蜂也

循按郭璞爾雅注云今江東大蠶在地中作房者爲土蠶啖其子卽馬蠶今荆巴間呼爲蠶木蠶似土蠶而小在樹上作房江東亦呼爲木蠶又食其子本草蜂子味甘平圖經云嶺表錄異載宣歙人取蜂子一房或五六斗至一石以鹽炒暴乾寄入京洛以爲食物翅足已成則不堪用今宣城蜂子掘地取之似土

蜂也

馬黑脊而般臂漏漏般臂前脰般般然也漏當爲螻如  
螻蛄臭也

循按周禮內饗作馬黑脊而般臂螻鄭司農云螻螻  
蛄臭也此注本之讀漏爲螻乃周禮釋文引干寶螻  
音漏內病也蓋康成以漏爲螻令升以螻爲漏列子  
周穆王篇云王之廚饌腥螻而不可饗張湛取鄭注  
云螻蛄臭也螻蛄蟲卽今之土狗方言螻蛄一名杜狗不聞其  
臭惡螻從婁說文婁空也釋名樓言隔戶諸射孔婁  
婁然也婁爲孔與漏義正同方言螻螻秦晉之間謂

之蠹或謂之天螻蠹食物成孔而與螻之名通則螻之名螻亦取其能穴物成孔耳呂氏春秋慎小篇云巨防空螻而漂邑殺人注云巨大防隄也如隄有孔穴容螻蛄則潰漏穿決至於漂沒閭邑溺殺人民也此螻卽漏字空螻卽孔漏也高誘解爲孔穴容螻蛄尙非是呂氏春秋盡數篇云流水不腐戶樞不蠹動也邱光庭兼明書引道書云流水不腐戶樞不蠹此螻直卽是蠹孔戶樞動搖故不生蠹蟲致成孔穴若取義於臭則馬肉可云螻蛄臭隄防戶樞不可通矣此干氏內病之訓勝於司農謂內病成孔婁婁然也

賈公彥謂內則螻爲漏脫字於義無所取不知周禮之螻正用漏義爲漏孔非爲漏脫增漏爲脫則非義矣

必脈脈脈脊側肉也

循按釋文脈音每徐亡代反夾脊肉易咸九五咸其脢虞翻云脢夾脊肉也釋文脢武杯反又音每鄭云背脊肉也說文同王肅又音灰廣雅云脾謂之脢廣韻脢脊側之肉重文脈同上

接以大牢接接讀爲捷捷勝也謂食其母使補虛強氣也



循按正義云補虛強氣宜速以速解捷字也乃注以捷爲勝補虛強氣卽所爲勝不以捷爲速也

不以隱疾注諱衣中之疾

循按白虎通衣裳篇云衣者隱也廣雅釋器衣隱也君羔臂虎植注植讀皆如直道而行之直直謂緣也

循按植字與特同於義無取故讀如直方言袒飾謂之直衿漢書廣川王傳爲去刺方領繡晉灼曰今之婦人直領也臂之緣似直衿直領故云直謂緣也臂形方其緣直而不曲取直道而行之直用其讀亦用其義也郊特性云首也者直也注云直或爲植首特

達宜作植臂直行宜作直

連用湯注連猶釋也

循按淮南子天文訓至于連石高誘注云連讀腐爛之爛連之爲爛猶漣之爲瀾蓮之爲蘭也釋文連力旦反正讀作爛爛爲腐熟之義上文出杆履蒯席注云杆浴器也蒯席澀便於洗足連字承上履蒯席謂足在杆中洗出向蒯席之上摩莎使垢腐爛皴起然後用湯滌去此腐起之垢蓋先用湯漬足次以足踐於蒯席上摩莎使垢腐爛又用湯然後在蒲席上又加摩莎使水氣與垢迹悉去也鄭以爲猶釋者釋卽

澤也史記武帝本紀先振兵澤旅徐廣云古釋字作  
澤曲禮其飯不澤手注云謂汙生不潔也澤謂揔莎  
也澤或爲擇以手揔莎則手掌垢腐起故汙手不潔  
猶足揔莎席上垢起也詩與子同澤箋云釋褻衣近  
汙垢亦以近汙垢則與膚相摩汙垢沾於衣故衣卽  
名澤也生民釋之漶漶淅米以手摩莎去其糠垢使  
米精潔猶摩莎手足去垢故云釋之也正義解連用  
湯云言釋去足垢而用湯爛旣以連爲爛矣又以釋  
爲釋去垢於義未明而解其飯不澤手云澤謂光澤  
也注明曰汙生謂揔莎則汙垢生若臨食使光澤則

不汙矣於義亦未明也

縞冠素紕紕紕緣邊也紕讀如埤益之埤而素帶終

辟辟辟讀如裊冕之裊裊謂以繒采飾其側

循按覲禮侯氏裊冕注云裊之爲言裊也此讀辟爲裊讀紕爲埤與覲禮注互相發明於衣上益以緣邊故取義於益埤之埤說文紕氏人紕也於緣邊之義不合故讀若埤素紕乃素埤之假借謂縞冠以素埤益之也

賓入不中門不履闕闕辟尊者所從也此謂聘客也闕門限

循按出禮大夫士出入君門由闌右不踐闕正義云  
出入不得踐履門限所以爾者一則自高二則不淨  
並爲不敬此最可疑無論宮門之尊卽士庶之家出  
入者豈有踐於闕上之事公門高其闕亦必高雖極  
不敬何至登於其上以自高而不絜邪顧命大輅在  
賓階面綴輅在阼階面考工記路門不容乘車之五  
个應門二轍參个樂師注云王如有車出之事登車  
於大寢西階之前反降於阼階之前然則門有車行  
車行則闕不得置今官署門限每日必徹去以通人  
行何至不俟其徹去而踐履之余嘗思其故此記文

鄭以不履闕屬賓入不中門貫下注云辟尊者所從則不獨中門爲尊者所從而此闕亦尊者所從蓋闕與門限有別掩兩扉則用門限投於兩棖而不設闕啟兩扉則除去門限而設兩闕設兩闕則門分爲三其兩闕之間爲中門闕東闕西爲人臣出入所由則不設闕兩闕間則設闕蓋兩闕卽連於闕上惟不入中門故不履闕此中門之闕惟君出入履之亦惟鄰國之君來出入履之不獨本國之臣不履此闕卽來聘之客亦不敢履此闕故下申言云公事自闕西私事自闕東闕東闕西無闕則由之兩闕之間有闕則

不敢踐所爲辟尊者之所從也惟有闕而兩闌居其  
兩端乃有一定尺寸而闌依闕以固若無此闕無論  
一闕兩闕將何所附正義謂中央豎短木作何豎法  
邪揆之蓋門限高必除去闕低不妨於出入云履云  
踐謂度越之非蹴其上也雖無明文可以虛會士冠  
禮及特牲饋食禮皆云席于門中闌西闕外門中闌  
西卽兩闌間之東也此處有闕則闌外無闕也聘禮  
擯者出立于門中以相拜記云賓者立于闕外以相  
拜亦闕在門中之證闕西二字緊屬門中謂爲門中  
之闌西非門西之闌西也於是曲禮言大夫士出入

君門由闌右不踐闕可得而明不踐闕所以由闌右  
由闌右所以不踐闕闌右卽闌西也由闌右則不踐  
闕由門中之闌西則必踐闕矣此注明連貫實入不  
中門不履闕八字而云辟尊者所從正義不知門有  
兩闌以爲自高不淨失之矣

而手足毋移圖移之言靡也毋移欲其直且正

循按說文迤裛行也夏書曰東迤北會于滙禹貢釋  
文迤以爾反馬云靡也考工記車軫四尺謂之一等  
戈秘六尺有六寸旣建而迤崇於軫四尺謂之二等  
注云鄭司農云迤讀爲倚移從風之移謂著戈於車



邪倚也弓人菑栗不弛則弓不發鄭司農云弛讀爲倚移從風之移謂邪行絕理者然則弛靡移三字義同靡弛疊言之耳靡弛移皆裏行故申言毋移欲其直且正正義云移謂靡弛搖動也宜直正不得邪低靡弛搖動也增出搖動非正義

圜豚行不舉足齊如流注圜轉也豚之言若有所循不舉足曳踵則衣之齊如水之流矣孔子執圭則然

循按釋文豚本又作豚大本反徐徒困反與遯音同豚卽遯字也易中孚豚魚釋文黃作遯遯卽遁遁與循俱從盾相通故讀豚爲循說文循順行也兩足遞

互而行各分左右不相遵順惟行於狹迤兩足不能分步則趾踵必相接左足之踵接右足之趾則動右足旋於左足之前以踵接左足之趾又動左足旋於右足之前以踵接右足之趾左右分步足自直前惟由後而前踵趾相接必旋轉如圈故爲圈豚言其圈而循也足趾離地而踵則曳地不舉於是裳之下齊拖曳於地如水之流蓋手執圭不能攝齊鞠躬而齊曳於地故其行如是鄭氏引論語執圭如有循明不執圭兩手攝齊則不如是行也方慤謂豚性善散圈之則聚陸佃謂豚行俯首宋人不識聲音訓詁之學

望文生意說愈新而愈戾釋文明作豚以爲豚豕失之遠矣正義云豚循也見衛湜集說汲古閣刻作豚豬也誣正義矣

雕簋簋簋邊屬也以竹爲之彫刻飾其直者也

循按祭統夫人薦豆執校注云校豆中央直者也爾雅竹豆謂之籩豆中央有直者籩當亦然所謂飾其直者此也管子弟子職柄尺不跪注云豆有柄長尺則立而進之蓋豆中央之校有似於柄故正義解鄭注飾其直爲彫鏤其柄喪大記食於簋者盥注云簋竹筥也釋文簋本又作匱士冠禮爵弁皮弁緇布冠

各一匱注云匱竹器名今之冠箱也古文匱爲簔箱  
筥則無中央之直者而置冠之器同於籩屬之簔蓋  
冠置簔上簔上闊中亦有柄其狀近籩故其名同爵  
弁皮弁各一簔各用一冠簔舉之也簔與簔通簔卽  
筥字束茅表位曰筥亦作叢束茅而立之其狀正同  
籩中之直然則簔卽籩中直柄之名撮而持之使高  
故所以立而持冠者亦以簔名之

殷以棋圖棋之言枳棋也

循按說文枳積枳也徐鍇云積枳不伸之意此枳棋  
卽積枳也荀子枸木必待蹏括烝矯然後直枸卽棋

也宋玉風賦枳句來巢枳句卽穢穢言樹木曲撓者  
鳥巢其上與下句空穴爲對李善以爲枳樹多句非  
也詩南山有枸北山有楸毛傳云枸枳枸楸鼠梓此  
以鼠梓與枳枸並舉是爲木名如陸璣所云枸樹高  
大似白楊有子本草所列枳楸是也此自木名正義  
言枳枳之樹其枝多曲撓殷俎似之然枳自爲曲義  
枳楸穢穢自爲不伸殷俎之楸謂殷俎之足曲耳樹  
之名枳枸亦取義於穢穢非殷俎取義於枳枸樹也  
正義迂矣詩正義又引宋玉枳枸來巢謂枸木多枝  
而曲所以來巢宋玉泛指多曲之木非必謂枳亦非

必謂枳枸矣此正義引陸璣草木疏云棋曲來巢考  
齊民要術詩正義藝文類聚所引陸疏均無此語或  
亦引宋玉賦誤爲陸疏與宋玉賦之枳句可引以證  
此棋字陸疏引以證詩之枸則非也

干裕及其高祖干猶空也

循按詩秩秩斯干傳云干澗也廣雅澗間也說文間  
隙也隙壁際孔也孔卽空故干猶空

所且先者五且先言未遑餘事

循按說文且薦也謂薦之於先以爲根本注用未遑  
二字似解且爲聊且玩下云五者一得於天下民無

禮記和疏卷二  
不足無不贍者五者一物紕繆民莫得其死則先此  
五者非聊且之謂

絕族無移服禮記族昆弟之子不相爲服

循按釋文移本或作施同以豉反移猶旁也此移字  
卽手足毋移之移謂邪也前云上治祖禰下治子  
孫旁治昆弟自祖禰以及子孫直行者也由昆弟以  
及族昆弟邪行者也族昆弟之子邪行至此則無服  
故云無移服孟子離婁篇施從良人之所之趙岐注  
云施者邪施而行故疑或作施

不疑在躬禮記躬身也不服行所不知使身疑也

循按正義云既問主人之道藝則己亦當習學明了不得使疑事在其躬衛湜集說遂以此句連屬上文乃鄭注則自爲章句耳服行所不知謂異常也身自處於妄欲人之信已難矣

執箕膺搗搗舌也

循按曲禮注引弟子職曰執箕膺搗釋文搗作葉

今管

子弟子職作膺搗

士冠禮加柶覆之面葉注云葉柶大端古

文葉爲搗士昏禮贊者酌醴加角柶面葉注亦云古文葉作搗柶也士昏禮下云面枋枋爲柶則葉爲扱醴處故云大端其形如葉亦如舌箕舌名葉而通



作搗亦此義也說文搗刮也搗之爲舌猶搗之爲刮  
矣

不旁狎圖妄相服習終或爭訟

循按正義云旁猶妄也不得妄與人狎習或致忿爭  
言因狎而致訟也以旁訓妄非也此與不好狎注互  
相發明服習爲狎狎乃敬人何以致訟致訟之由在  
於旁狎旁之言溥也旁之言廣也於此人吾服習之  
於彼人吾又服習之原非心悅誠服第隨聲氣以爲  
依緣故爲妄相服習門戶之見嫉妬生焉故終或爭  
訟旁狎卽好狎也正義說未是

枕几穎杖注穎警枕也

循按藝文類聚引蔡邕警枕銘云應龍蟠蟄潛德保靈制器象物示有其形哲人降鑒居安聞傾說文傾仄也穎從頃與傾同聲警枕之名傾猶畚之欹者名頃筐也承上枕几而言臥之所憑爲枕坐之所憑爲几坐而欹臥者則穎穎之爲器蓋擁於後坐久倦怠欹倚於上取義於傾仄故名穎穎倚一聲之轉其背高仰可承首故有枕名後人用倚使背有所依首有所承卽名倚乃穎之遺制亦穎之遺稱也玩蔡銘稱應龍蟠蟄蓋擁於後作箕形如龍之蟠繞有翼者爲

應龍可見兩翼張於左右近世倚背圈裏而前正是其象高年之人久坐則倦須有穎以安之故云安居聞傾古文苑注引曹公操以小木圓枕警睡吳越備史錢鏐在軍中未嘗安寢復用圓木小枕睡熟則欬由是得悟名曰警枕此名同於古而利取於曹與蔡邕所銘者大殊古取其安此取其不安義亦別矣釋文穎京領反警枕也又垌迴反岳珂九經三傳沿革例云鄭注以穎爲警枕者所以別下文經文卻刃授穎之穎則以爲兩穎字字同而義異釋文以警枕之穎其旁下從火音京領反以授穎之穎其旁下從禾

音役頂反則字異而音亦異然則岳氏所見釋文作

頽與正義本不同然頽義取傾形卽同於頃筐

張端義貴

耳集校椅栲栳狀

或從禾或從火皆傾之假借也頽通爲隱

孟子隱几而臥趙岐謂隱倚其几警則頽隱聲之譌耳李尤讀書枕銘云聽政理事怠則覽書傾倚偃息隨體興居此云傾倚亦以枕名蓋卽頽類也

刀卻刃授頽削授拊音頽環也拊謂把

循按釋名刀到也其末曰鋒其本曰環史記平原君列傳平原君曰夫賢士之處世也譬若錐之處囊中其末立見毛遂曰使遂蚤得處囊中乃頽脫而出非

特末兒而已末謂錐之鋒則穎謂錐之本卻刃授穎  
謂卻末授本其本曰環故穎卽環也今人於錐本亦  
作環釋文削音笑考工記魯之削釋文削如字李思  
約思詔二反思詔卽音笑也又槩氏執下齊注大刀  
削殺矢鑿燧也釋文削如字李音笑槩氏爲削注云  
今之書刀說文削鞞也鞞刀室也此削授柎乃書刀  
故有把釋文音笑用李軌周禮音也

會同主詡

**詡**

詡謂敏而有勇若齊國佐

循按說文詡大言也汎以爲大言恐涉於夸詐故以  
敏而有勇明之又舉國佐明國佐舉四王五霸以折

晉人是言也晉人欲蕭同叔子爲質盡東其畝破之以禮德是敏請背城借一而不屈是有勇國佐言而魯衛懼晉人遂平故會同主之禮器德發揚詡萬物注云詡猶普也徧也普亦大義

數噍毋爲口容

**注**

口容弄口

循按曲禮毋刺齒

**注**

云爲其弄口也前運笏澤劍首注云運澤謂玩弄也澤爲接莎然則弄口謂手弄其口也

牛羊之肺離而不提心

**注**

提猶絕也

循按下折九箇注云折斷分之也廣雅絕斷也此注

讀提爲折故云猶絕也檀弓吉事欲其折折耳注引  
詩云好人提提以提提明折折是提卽折也說文哲  
知也本草知母一名蜺母范子作提母然則提與知  
通提之爲折猶知之爲哲也又說文提挈也司馬相  
如封禪書挈三神之歡應劭曰挈絕也挈訓絕卽提  
之訓絕亦其證矣

孫授易校字

禮記補疏卷二終

禮記補疏卷三

江都焦循學

時觀而弗語存其心也。○使之悻悻憤憤然後啟發也。循按當其可之謂時觀者示也。當其可因有所示所以能使之悻憤若徒弗語而無所示抑有所示而不當其可則何從而悻憤乎。正義以時觀爲教者時時觀之解說未明。

不學博依不能安詩。○博依廣譬喻也。依或爲衣。

循按說文衣依也。白虎通云衣者隱也。漢書藝文志詩賦家有隱書十八篇。師古引劉向別錄云隱書者



疑其言以相問對者以慮思之可以無不諭韓非子  
難篇云人有設桓公隱者曰一難二難三難呂氏春  
秋重言篇云荆莊王立三年不聽而好讒高誘注云  
讒謬言下載成公賈之讒云有鳥止于南方之阜三  
年不動不飛不鳴是何鳥也王曰其三年不動將以  
定志意也其不飛將以長羽翼也其不鳴將以覽民  
則也是鳥雖無飛飛將冲天雖無鳴鳴將駭人賈出  
矣不穀知之矣明日朝所進者五人所退者十人羣  
臣大悅史記楚世家亦載此事爲伍舉曰願有進隱  
裴駟集解云隱謂隱藏其意時楚莊拒諫故不直諫

而以鳥爲譬喻使其君相悅以受與詩人比興正同  
故學詩必先學隱也其後淳于髡鍾離春東方朔皆  
善隱淳于髡事與成公賈同司馬遷以爲滑稽蓋未識古人之  
學矣

强而弗抑抑猶推也

循按正義云謂師微勸學者使神識堅强師當隨才  
而與之使學者不甚推抑其義而教之此於强抑二  
字說之不明强謂勉也推謂擠排之也勉其所未知  
未能其有所知有所能不擠排之呂氏春秋誣徒篇  
云弟子居處修潔身狀出倫聞識疏達就學敏疾則

從而抑之

待其從容然後盡其聲。從讀如富父春戈之春。春容謂重撞擊也。始者一聲而已。學者既開其端意進而復問乃極說之。如撞鐘之成聲矣。從或爲松。

循按從容有二義。其一楚辭懷沙孰知余之從容。王逸云從容舉動也是也。其一詩都人士序從容有常箋云從容謂休燕也是也。二義皆不煩讀從如春正義云春謂擊也以爲聲之形容。言鐘之爲體必待其擊每以春爲一容。此以春容二字分說其義。穿鑿無聊殊非鄭義。試仍於注求之。則注明以重撞擊三字。

解春容二字下又申言之謂旣開其端意進而復問復問與重撞擊正相應復亦重也凡撞鐘其聲悠長不卽盡今待問者小叩小鳴大叩大鳴亦不卽盡說之待其意有所進而復問乃以前未盡之說極說以盡之如始撞鐘之一聲悠長未遽盡待重撞一聲此聲合前未盡之聲極成其盛而後盡之注義明白可按然則重撞擊三字擊字解撞字重字解春容二字待其春容卽待其重撞春容者重字之緩聲從容不能翻重字故必讀從爲春春容之爲重猶終葵之爲錐之爲旃也待其從容然後盡其聲卽待其重

然後盡其聲也容訓爲寬

廣雅

亦訓爲貌

說文卽頌字

由貌

之訓而疊呼之爲從容則訓舉動由寬之訓而疊呼之爲從容則訓寬裕二義皆由容字引申之春容則由春字引申爲重引左傳取其聲不取其義正義以春爲擊失之遠矣其解然後盡其聲言善答者以待其一問然後一答乃後盡說義理則是不待復問卽是不待重撞擊與注全然反背可謂之楚而北行矣是故審聲以知音審音以知樂審樂以知政

循按耳之於聲口之於味目之於色皆性也禽獸不能審聲故知聲而不知音衆庶能審聲不能審音故

知音而不如君子之知樂衆庶不知樂不能自平好惡君子知樂則制禮樂以教民平好惡性戾庶能聳聲卽能變化於禮樂刑政所爲同民而出治道者以衆庶之能審也若禽獸全不能審故犬馬之性與人殊而非禮樂政刑所能教矣

人生而靜天之性也感於物而動性之欲也言性不見物則無欲物至知知然後好惡形焉至來也知知每物來則又有知也言見物多則欲益衆形猶見也好惡無節於內知誘於外不能反躬天理滅矣節法度也知猶欲也誘猶道也引也躬猶己也理猶性也

言言利政卷三  
四  
夫物之感人無窮而人之好惡無節則是物生而人  
化物也人化物也者滅天理而窮人欲者也。窮人欲  
言無所不爲

循按說文性人之陽氣性善者也情人之陰氣有欲  
者人欲卽人情與世相通全是此情己所不欲勿施  
於人已欲立而立人已欲達而達人正以所欲所不  
欲爲仁恕之本有己之欲而不通乎人之欲是爲窮  
人欲窮人欲猶云不通人情聖人通天下之志正賴  
以己之欲不欲絜矩乎人之欲不欲所謂反躬也人  
生而靜首出人字明其異乎禽獸靜者未感於物也

性已具於中是天賦之也感於物而有好惡此欲也  
卽出於性欲卽好惡也物至知知二句申上感物而  
爲欲也知知者人能知而又知禽獸知聲不能知音  
一知不能又知故非不知色不知好妍而惡醜也非  
不知食不知好精而惡疏也非不知臭不知好香而  
惡腐也非不知聲不知好清而惡濁也惟人知知乃  
有好惡有好惡乃有欲有欲乃能反躬故人之性善  
反躬則人之所好好之人之所惡惡之從心所欲不  
踰矩也不反躬則好人之所惡惡人之所好是謂拂  
人之性也好惡生於欲欲本於性故云性之欲理者



分也人各有性卽人各有欲是天所分畀諸人而不私於一人者也故通其欲而欲不窮合其理而理不滅聖人惟盡其性以盡人之性斯不肯絕欲夫不能推己之欲以及人之欲固人欲窮絕己之欲而不計人之欲亦人欲窮人之欲卽天所分之理故欲窮則理滅也窮之言絕也弱爲強脅寡爲衆暴愚爲知詐怯爲勇苦疾病不養老幼孤獨不得其所而人之欲絕矣

方以類聚注方謂行蟲也

循按下文樂行而民鄉方注云方猶道也射義注云

道猶行也是方有行義與物對言此爲物之行者故云行蟲也

感條暢之氣注感動也動人條暢之善氣使失其所

循按感爲撼之省廣雅撼動也說文作撼搖也

德者性之端也

循按性之端猶孟子言仁之端義之端端首也性不可見而見端於德正義云端正非是

石聲磬注磬當爲磬字之誤也

循按釋名磬磬也其聲磬磬然堅緻也釋文磬口挺反一音口定反磬口定反磬磬古亦通用磬磬卽論

語子擊磬之硜硜史記樂書石聲硜

致右憲左**田**致謂膝至地也憲讀爲軒聲之誤也

循按以至明致至卽輕也故憲爲軒

則易直子諒之心**田**子讀如不子之子

循按書金縢是有丕子之責于天正義引鄭注丕讀  
曰不又云愛子孫曰子此丕子蓋指是虞書作子弗  
子

故禮有報而樂有反**田**報讀爲褒褒猶進也

循按上文禮減而進以進爲文樂盈而反以反爲文  
反與進對此不言進言報報無進義故讀爲褒而以

爲猶進也。衰卽哀多益寡之哀。哀聚也。鄭氏注易作  
攄攄取也。釋名取趣也。趣卽趨趨卽驟驟亦與聚通。  
少儀毋拔來毋報往。注云報讀爲赴疾之赴。拔報皆  
疾也。喪服小記報葬者報虞。注云報讀爲赴疾之赴。  
謂不及期而葬也。說文赴趨也。从仆仆从卜聲。與衰  
聲近。趨爲疾行。故赴義爲疾疾行亦進也。故哀有進  
義。讀報爲衰猶讀報爲赴也。其實報者復也。復與反  
對。進與退對。前言進此言報明進卽是報卽明反卽  
是退。古人互相發明之妙。正不必讀報爲衰乃爲猶  
進矣。

內子以鞠衣褻衣素紗六服皆袍制不禪以素紗裏  
之如今袿袍襪重繪矣

循按釋名婦人上服曰袿其下垂者上廣下狹如刀  
圭也襪緣也青絳爲之緣也謂有袿之袍下有緣裏  
用重繪以重繪明袍之有裏襪兼言之耳釋文襪士  
眷反與緣音近下纁衲釋文云衲字又作紉而占反  
裳下襪也正義云衲裳下緣襪也

繭衣裳繭衣裳者若今之大襦也

循按釋名襦屬也衣裳上下相連屬也荊州謂禪衣  
曰布襦亦曰襦襦言其襦襦宏裕也正義云纁爲繭

謂衣裳相連而綿續著之也衣裳相連本大襦言

中路嬰兒失其母焉

**注**

嬰猶驚彌也言其若小兒亡母

循按釋名釋長幼云人始生曰嬰兒胷前曰嬰抱之

嬰前乳養之也或曰嬰媿嬰是也言是人也媿其眊

聲也故因以名之也嬰媿卽驚彌卽小兒啼聲疊言

之爲嬰媿爲驚彌謂嬰爲是非也此記嬰兒但作小

兒解非卽以嬰爲失母之啼聲鄭以驚彌解小兒所

以名嬰之義以其啼聲故其啼號二字自解何常聲

句非仍指嬰字也蓋嬰之本訓爲頸飾

**說文**

無涉於小

兒其得名嬰猶驚彌也玉篇引蒼頡篇云女曰嬰男

曰兒

其所與遊辟也可人也言此人可也但居惡人之中使之犯法

循按說文辟法也其訓邪者則讀爲僻此注居惡人之中解其所與遊四字使之犯法解辟字鄭自訓辟爲法惡人之義包寓所字中不解辟爲邪也正義云所與交遊是辟邪之人故犯法爲盜是一辟字兼邪法兩義矣

皆升自東榮中屋履危圖榮屋翼升東榮者謂卿大夫士也天子諸侯言東雷危棟上也

循按史記魏世家趙使人謂魏王曰爲我殺范痤吾  
請獻七十里之地魏王曰諾使吏捕之圍而未殺痤  
因上屋騎危集解云危棟上也索隱云禮云中屋履  
危蓋升屋以避兵也棟上也屋脊其處最高故名危  
屋脊故可騎上平則可履矣元人熊朋來經說謂大  
記言東霤注云危棟上也竟以危棟上三字爲解東  
霤失之

君設大盤造冰焉造猶內也

循按造與聚通謂聚冰於盤中也內卽納字造無納  
義故云猶內譬況之也正義謂造是造詣凡造詣者



必入於內鑿矣

御者差沐于堂上。差淅也。淅飯米取其瀋以爲沐也。循按沐卽瀋也。故云取其瀋以爲沐。因爲沐所用。故卽名之爲沐。差沐者。差摩之以爲沐也。下云。君沐梁。大夫沐稷。謂君之沐用梁。差之大夫之沐用稷。差之管人受沐。卽受此沐也。管人授御者沐。亦卽授此沐也。下云。乃沐沐用瓦盤。始作沐浴。解儀禮士喪禮云。外御受沐。入注云。沐管人所養瀋也。史記外戚傳。竇廣國曰。姊去我西時。與我決於傳舍中。丐沐沐我。索隱云。沐米瀋也。謂乞瀋爲弟沐也。此兩沐字上沐字。

正御者差沐之沐下沐字爲沐用瓦盤之沐正義未  
詳析

朝一溢米莫一溢米注二十兩爲溢於粟米之法一溢  
爲米一升二十四分升之一

循按正義云說左傳者云百二十斤爲石則一斗十  
二斤爲兩則一百九十二兩則一升爲十九兩有奇  
今一兩爲二十四銖則二十兩爲四百八十銖計十  
九兩有奇爲一升則總有四百六十銖八叁以成四  
百六十銖惟有十九銖二叁在是爲米一升二十四  
分升之一孫子算經云稱之所起起於黍十黍爲一

糸十糸爲一銖二十四銖爲一兩十六兩爲一斤三十斤爲一鈞四鈞爲一石四鈞爲一百二十斤故一百二十斤爲一石以每斤十六兩通之是一石爲一千九百二十兩一斗爲一百九十二兩一升爲一十九兩二錢古以二十四銖爲兩不以十錢爲兩故云一十九兩有奇爲一升以一十九兩二錢乘二十四銖得四百六十銖零八糸正義云八叁乃卽八糸也於四百八十銖減去四百六十銖零八糸餘一十九銖零二糸正義云以成四百八十銖成字乃減字之譌也又云惟有十九銖二叁在二叁卽二糸也置一

升四百六十銖零八綮以二十四除之確得十九銖  
零二綮是一升二十四分升之一爲四百八十銖卽  
是二十兩也此疏作叁儀禮旣夕疏作綮夢溪筆談  
辨證篇云唐書開元錢重二銖四叁今蜀郡亦以十  
叁爲一銖叁乃古之綮字恐相傳之誤耳然則賈氏  
儀禮疏作綮爲正唐初已誤綮爲叁孔穎達不知改  
正直以市俗叁字入於經疏而不知謬慎矣至減字  
譌成自衛湜集說已然歷來校者未有以正之特爲  
詳焉甄鸞五經算術云置一斛米重一百二十斤以  
十六乘之爲積一千九百二十兩以溢法二十兩除

之得九十六溢爲法以米一斛爲百升爲實實如法  
得一升不盡四升與法俱再半之名曰二十四分升  
之一稱法三十斤曰鈞四鈞曰石石有一百二十斤  
也所以名斛爲石者以其一斛米重一百二十斤故  
也此不用銖法而用石法以九十六溢除百升每溢  
一升除去九十六升尙餘四升故云不盡四升半其  
四升爲二升再半其二升爲一升半其九十六爲四  
十八再半其四十八爲二十四二十四分升之一卽  
九十六分升之四以九十六分升之四約爲二十四  
分升之一所謂可半則半之術也劉徽九章算術約

分列方田鄭以爲粟米者本溢法石法言之也算法  
宜依甄鸞其數以正義參之可明耳

結絞不紐

循按紐今俗所謂活結不紐今俗所謂死結

瘞埋於泰折田折炤哲也

循按易大有傳明辨哲也虞翻作折

曰司命曰中霤曰國門曰國行曰泰厲曰戶曰竈田小  
神居人之間司察小過作譴告者爾

循按抱朴子對俗篇引玉鈐經中篇云上天司命之  
神察人過惡太平御覽引萬畢術云竈神晦日上天

白人罪潛夫論忠貴篇云文昌奠功司命舉過

煮蒿悽愴𤇀煮謂香臭也蒿謂氣烝出貌也

循按煮通薰亦通薰薰爲香氣故云謂香臭猶云其  
臭香也正義以煮蒿悽愴專屬百物以爲或香或臭  
非注義也煮蒿與悽愴皆雙聲字煮蒿蓋謂其氣之  
溫和悽愴謂其氣之肅穆薰熏同字薰爲香氣熏爲  
氣烝出注互見之耳

見以蕭光 見間以俠𤇀𤇀見及見間皆當爲覲字之  
誤也

循按釋文見間依注合爲覲字音間廁之間雜記覲

甄符衡實見間釋文亦云一解云鄭合見間二字共  
爲覲字雜記注云實見間藏於見外椽內也彼處見  
間二字鄭未合作覲也鄭以覲爲雜卽間雜覲亦通  
作間

風戾而食之  風戾之使露氣燥

循按釋文戾力計反燥也正義云戾乾也戾何以有  
乾燥之義戾與暴義同說文暴晞也爾雅釋天云日  
出而風曰暴以戾通之於暴則暴有虐義以暴通之  
於戾則戾有晞義

易之失賊  易精微愛惡相攻遠近相取則不能容人



近於傷害

循按鄭氏以爻辰說易未知易教所在論語云好信不好學其蔽也賊正可與此經相證易重有孚孚者信也故以中心誠實爲主然必以變通爲利徒知誠信不知變通卽與好信不好學者等故賊賊者害也害則不利故信必近於義義則絜靜精微而不失之賊矣

故衡誠縣田誠猶審也或作成

循按誠無審義以下君子審禮則誠縣誠陳誠設旣與審禮爲比例故謂此言誠猶彼言審也誠實也卽

審其實與不實故不可欺不可誣誠審亦互辭矣又云或作成成平也平與辨通成縣爲平縣卽是辨其縣亦卽是審其縣故以或作成明其與審義同也寡人固不固焉得聞此言也固固不固言吾由鄙固故也

循按正義引皇氏用王肅之義二固字皆爲固陋上固言已之固陋下固字言若不鄙固則不問不問焉得聞此言此得之乃正義不用別爲說云上固是鄙固下固故也言寡人由鄙固之故所以得聞此言蓋以注中故字爲解不固固字然若是於不字何以達

注中故字乃會不字焉得字而明之經文反言注正  
言宜依皇氏陸佃云寡人固句言寡人以固故得聞  
此言若不固安得聞此言也

寡人蠢愚冥煩子志之心也。志讀爲識識知也冥煩  
者言不能明理此事子之心所知也欲其要言使易行  
循按寡人蠢愚冥頑爲句注以蠢愚易解故但解冥  
煩冥猶迷也理者條理孔子之言條理詳備哀公不  
能明了故云冥煩謂迷惑於條理而心爲之煩亂也  
惟蠢愚所以冥煩冥煩者我不明也子識之心者子  
自明也我不能明此條理而至於煩故欲夫子要言

使易行要言二字從煩字生出非從志字生出近人每云頭緒太多我不明白此冥煩不能明理之謂也領惡而全好者與**雅**領猶治也

循按樂記領父子君臣之節注云領猶理治也領理一聲之轉釋名云令領也理領之使不得相犯也廣雅云令禁也

橫從其畝**雅**橫從橫行治其田也

循按毛詩傳云衡獵之從獵之釋文引韓詩從作由東西耕曰橫南北耕曰由此注以從爲行與毛韓異廣雅云從行也

費而隱注費猶俛也道不費則仕

循按釋文費本又作拂詩皇矣四方以無拂箋云拂猶俛也言無復俛戾文王者俛通詭訓戾亦訓譎上文素隱行怪注云言方鄉辟害隱身而行俛譎俛異也旣以俛明怪又以譎明俛旣以俛譎明行怪又以俛明費蓋謂隱不可俛仕亦不可俛也心鄉於隱則無論可隱不可隱而一以隱爲鄉則其隱爲俛此不可一於隱者也若可隱而一以不隱爲事則必俛道俛而仕所謂俛遇也君子之道若必俛而乃得仕則君子不仕矣故云費而隱此不可一於仕者也道不

費則仕言不佞遇則仕不論世之治否孔孟固栖栖於春秋戰國矣不肯佞遇故不仕也正義云君子之人遭值亂世道德違費則隱而不仕以費指世非注義素隱至費而隱當爲一章

故栽者培之注栽讀如文王初載之載栽猶殖也今時人名草木之植曰栽築牆立版亦曰栽栽或爲茲

循按詩大明文王初載毛傳云載識毛讀載爲識此注讀栽爲載卽讀栽爲識識與殖音通可訓爲殖也識之爲殖猶櫟之爲埴

其次致曲曲能有誠注致至也曲猶小小之事也不能

盡性而有至誠於有義焉而已

循按易繫辭傳曲成萬物而不遺荀爽云曲成萬物不遺細微也細微是小之又小也曲成則由至大以及至小而不遺致曲則由至小以及至大而能化表記道有至義有考至道以王義道以霸注云此讀當言道有至有義有考字脫一有耳有至謂兼仁義者有義則無仁矣有考考成也能取仁義之一成之以不失於人非性也此注所云於有義焉而已卽表記有義有義無仁故爲曲非性卽不能盡性

口費而煩難費猶惠也言口多空言且煩數也費或爲

悖或爲悖

循按孟子言分人以財謂之惠說文費散財用也分人以財則必散財用故費惠義近論語以因民之所利而利之爲惠而不費此惠而不必分人以財孟子以可以與可以無與與爲傷惠惠而傷惠卽費矣此注訓費爲惠申之以口多空言則徒有惠愛之言而終無分與之實其取怨咎深矣費之爲悖猶弗之爲悖紉之爲悖悖爲諄之重文悖蓋卽諄字言悖而出不俟煩數而已得咎此承君子溺於口故不用悖義而已爲猶惠也



續衽鉤邊注續猶屬也衽在裳旁者也屬連之不殊裳前後也鉤讀如烏喙必鉤之鉤鉤邊若今曲裾也

循按裳前後皆正幅其旁用斜幅分於左右使前後相屬是爲續衽注文甚明惟鉤邊注以曲裾明之漢書江充傳充召見犬臺宮自請願以所常被服冠見上上許之充衣紗縠禪衣曲裾後垂交輸如淳曰交輸割正幅使一頭狹若燕尾垂之兩旁見於後是禮深衣續衽鉤邊此言曲裾之制甚詳蓋衽屬於前後正幅曲裾又屬於前衽而交於後衽前衽與後衽相屬其一旁衽與衽相連其一旁衽不能與衽相連故

別用一幅屬於前衽而揜於後衽衽與曲裾皆邪裁  
衽上狹下寬曲裾上寬下狹不可使一旁有一旁無  
於其一旁衽雖與衽相連而前衽亦用曲裾揜於後  
衽兩邊俱有曲裾揜於後之左右皆上寬下狹合之  
故似燕尾就兩邊而合觀之似燕尾就一邊而分觀  
之則似鳥喙故讀鳥喙必鉤之鉤鉤卽句謂銳角似  
鳥喙則銳之至者也一正幅邪解之使寬頭向上狹  
頭向下其銳形誠如鳥喙之鉤矣衽爲前後正幅之  
邊此左右兩曲裾又爲前兩衽之邊邊以盡處言之  
兩曲裾揜於後不更有續之者故名爲邊邊卽曲裾

之名在漢時謂之曲裾在古直謂之邊耳所以屬此  
衽者在此鉤邊正義謂一旁連之相著一旁有曲裾  
揜之與相連無異然則何以有燕尾形宜以如淳之  
說申鄭注也

壺頸脩七寸腹脩五寸口徑二寸半容斗五升壺脩長  
也腹容斗五升三分益一則爲二斗得圓困之象積三  
百二十四寸也以腹脩五寸約之所得求其圓周圍周  
二尺七寸有奇是爲腹徑九寸有餘也

循按劉徽九章算術商功篇云今有圓困高一丈三  
尺三寸少半寸容米二千斛問周幾何術曰置米積

尺以十二乘之令高而一所得開方除之卽此圓困  
求周術也故甄鸞五經算術云斛法一尺六寸二分  
上十之得一千六百二十寸爲一斛積寸下退一等  
得一百六十二寸爲一斗積寸倍之得三百二十四  
寸爲二斗積寸以腹脩五寸約之得六十四寸八分  
乃以十二乘之得積七百七十七寸六分又以開方  
除之得圓周二十寸餘四十八寸六分倍二十七從  
方法得五十四下法一亦從方法得五十五以三除  
二十七得九寸又以三除不盡四十八寸六分得一  
十六寸二分與法俱上十之是壺腹徑九寸五百五

十分寸之一百六十二母與子亦可俱半之爲二百七十五分寸之八十一蓋方田之術周自乘十二而一得積此平圓周求積也今積求圓周故十二乘之也圓堦壙周求積周自乘以高乘之十二而一此圓困周求積也今積求圓困周故以脩五寸約之也以五寸約之則圓困變爲平圓十二乘之仍卽圓周自乘之數也得數開方之是由圓周自乘之數求得圓周也立圓居圓困四分之三鄭以容斗五升之腹爲圓丸形故三分益一得圓困之象五曹算經倉曹以一尺六寸二分爲斛法蓋平方一尺高一尺六寸二

分立方一尺得積一千寸平方一尺高六寸得積六百寸平方一尺高二分得積二十寸故上十之得一千六百二十寸一斛十斗今二斗故得積三百二十四寸古率徑一周三鄭氏用之也鄭用開方求得二十七寸不盡故云二尺七寸有奇甄鸞以餘積命分故爲壺腹徑九寸五百五十分寸之一百六十二正義不採甄鸞之數又不詳圓積求周之法文多煩費莫識其要至以壺腹三分益一成圓困必爲圓困乃可以脩五寸約之得平圓得平圓乃可求周鄭氏通九章其注未有失誤李淳風與孔穎達同時其校劉

微甄鸞等書極詳明當時曷不訪問之刺刺於圓求  
方方求圓何哉

若是者浮注浮或作匏

循按淮南子說山訓百人抗浮高誘注云浮瓠也毛  
詩傳云匏謂之瓠春秋盟于浮來穀梁作包來易以  
杞包瓜王弼讀作匏瓜

毀方而瓦合注毀方而瓦合去己之大圭角下與衆人  
小合也

循按漢書陳湯傳云湯知烏孫瓦合不能久攻師古  
曰瓦合謂碎瓦之雜居不齊同瓦本有圭角不可合

毀去圭角而瓦乃可合方卽瓦之方瓦有圭角則大  
毀去圭角則小故云小合

是以君子有絜矩之道也**絜**猶結也絜也矩法也君  
子有絜法之道謂常執而行之動作不失之 此之謂  
絜矩之道**絜**矩之道善持其所有以恕於人耳

循按周禮絜壺氏注絜讀如絜髮之絜說文絜縣持  
也釋名絜結也結束也束持之也絜絜結三字通絜  
有持執之義故鄭以執持申言之結之義爲約故絜  
亦訓約以法約之所以爲恕使上下前後左右合而  
爲一如契之相約也算術以如法而一爲約數之不



齊者約之則齊挈法猶之云約法耳

與爲人後者禮與猶奇也後人者一人而已既有爲者而往奇之是貪財也

循按士昏禮記云子有吉我與在注云與猶兼也古文與爲像此釋文與音預蓋已有爲後之人而此又兼之注以爲猶奇者兼則疑於宜之奇爲卦扌之餘則不當與於正揲之數矣與不訓奇故云猶奇兩人相兼爲偶此兼之轉爲奇如指有六不爲偶而轉爲枝矣

禮記補疏卷三終

姪廷琮校字